



Орган Лемковского Союза.

Выходит в каждый четверг.

Редакция и администрация в Крыници. — Адрес „Лемко” Крыница.

Всіх читателєй, котры не вплатили ище пренумераты, просиме выровнати якнайскорше рахунки.

Также просиме присылати членскы вклады до Лемко-Союза.

Просиме присылати материал до календара на рок 1936.



Пренумерата в краю:

30 грошей місячно,
80 „ квартално
1.50 „ полрочно,
3 зл. рочно.

В Америкі: 1 дол. рочно.

В Чехословакии:

2 кор. місячно, 10 кор. полрочно,
20 кор. рочно.

Контото чекове Нр. 404.155.

ИЩЕ О Т-СТВІ одной бандуры.

В двох попередних числах Лемка порушено справу барз важну, котра повинна заинтересовати загал нашого населеня.

Перед войном мали мы на Лемковщині 3 бурсы (в Новом Санчі, Горлицах и Сяноці). Крім того была бурса в Перемишлі, в котрой также выховало ся много лемковской молодежи. В tych бурсах образовала ся наша молодежь, котра по окончению студий занимала різны постерунки и ставала в ряды труженников на народной ниві. Той молодежи и tym бурсам завдячат Лемковщина розвите по наших селах читальняного житя, — они оживляли культуральный и экономичный рух и их труд дал добры результаты в напрямі культуральном и экономичном. Станем довоенной интеллигенции, а передовсем довоенного священства основано на Лемковщині три кредитовы Т-ва „Бескид” в Сяноці, Лемковску Касу в Горлицах и „Надежду” в Крыници, котры развивали ся добре и стали ся фундаментом житя экономичного. По селах закладано ряд кас Райфайзена (теперешны Стефчика) и великы кооперативы молочны и склеповы. Молочарский кооператив в Лабові мал чотыры филии, а молочарня в Ждыні — три. В tych всіх институциях трудилась наша интеллигенция разом с хлопом, котрый, видячи, же работа иде, развиват ся и приносит доходы, набрал віры в себе и брал ся со свойственным ему завязком и вытревалоством до работы.

Мило было втотчас перейти ся по лемковских селах. Всяди свои люди при народной работі, котра кипит и иде на выбіжки. Бо треба нам знати, же наш хлоп, як ся рушит, то рушат ся уж добре. Его трудно спонукати, але має свой гонор и честь и не любит оставати с заду, — тому, дай Боже начати даяке діло в одном селі, то зараз и други села заводят того у себе, бо не хотят быти горши от тамтых. Той

амбиции нашего села належит приписати, же перед войном люди охотно приступали в члены різних экономичных и культуральных товариств и принимали в их житю активну участь. Світова война знищила цілый наш доробок и розсыпала наших людей. Интеллигенция або вымерла, або выйхала до других держав. Остал сам хлоп, котрый прибитый гонением австрийских жандармов, стратил віру в себе и в свои силы. Упали наши товариства, пропили и знищили наш доробок наши братя, украинцы, котры запропастили бурсу в Новом Санчі и кредитовое товариство „Надежду” в Крыници. Упала каса в Горлицах, заломил ся „Бескид”, перестала существовати бурса в Сяноці и Перемишлі. Спасено лем одну бурсу в Горлицах, котра, хоц обкроена, але существует и развиват ся добре. Як довідую ся с Лемка, має она в том році 32 учеников. Ест то уж без мала стан довоенный. С того видно, же наш народ будит ся знова. Он зрозуміл, же ему ест потребна трудова интеллигенция и хоче увеличити ей ряды. Ест то потішающее явление, котрому каждый с нас мусит по своим силам помочи. Счастлива ест гадка дати помоч учачой ся молодежи в формі, наведенной в попередних числах Лемка. Направду одна бандура, або одна головка капусты не уничтожит никого и никто не спостереже навет того убытка, а дана така жертва всіма, представляют барз выдатну помоч.

Приятель.

ПОМІЩАЙТЕ
ОГОЛОШЕНА
В ГАЗЕТІ „ЛЕМКО”

Зимушны курсы в Крыници-Селі.

В часі зими того року намірят ся устроити в Крыници селі два курсы.

Оден с tych курсов буде обнимати науку церковного и світского співу в практиці и в теории и має он приготувати квалификованых дырыгентов хоров церковных и світских. Курс тот буде мати два отділы, оден отділ нисший для курсантов, котры мають добрый голос и слух, але не знают нот и не учили ся співу и отділ высший, для tych, котры уж знают теорию співу и хотят дополнити свои знания.

Оплата за науку на курсі низшом выносит 20 злотых, а на курсі высшом — 25 злотых от особы. Курс треват 2 місяцы (листопад и грудень). Курсанты на том курсі удержуют ся сами.

Не потреба додавати, яке значенє в житю культуральном має спів и музыка. Ничим иншим не притягне ся до читальні так людей, як співом и музыком. Особенно русский народ, а медже ним и лемкы, выповідают в співі и музиці всі свои душевны пережитя, свои смутки и радости. Музыка ест их бесідом, в котрой выповідают ся их душа, их жаданя и страсти. Тому то каждая читальня повинна мати дырыгента хору, котрый бы при співі организовал молодежь и заохочал ю до позиточной книжки и газеты. Случайность вышколити такого дырыгента дає курс дырыгентов в Крыници. Курс тот буде провадити знаний в світі музычном дырыгент и композитор, г-н Александер Ропицкий, што дає полне ручательство, же абсольвенты курса осягнут намічену ціль и суміют вести церковны и аматорскы хоры, а выданный на науку грош принесет селам користь.

Если курс дырыгентов хоров служит больше культуральным цілям, то

курс ткацкий!

який намірят ся также урядити в зимі т. р.

в Крыниці-Селі, має вартість матеріяльну і ціль його єст поднести доходи с наших господарств.

Як відомо, наши домашны полотна льняны сут выроблені зле и прото сут слабы. Груба кошеля с домашнего полотна дре ся скорше от купной баволняной, хоц материял не ней єст значно ліпший и сильнійший. Причина того лежить в том, же нитки сут скручены неправильно и неоднотайно. В одном місци нитка єст недокручена, в другом перекручена, ту тоньша, там грубша. Также и выробленє полотна єст планне. Полотно єст дакади сильно збите, а дакади рідке. Тоты недостатки в выробі домашнего полотна стают ся причином, же полотно льняне єст слабе и має низку ціну.

Ціна того полотна поднесе ся значно, если его выроб буде ліпший. И именно курс ткацкий має тоту ціль поправити гатунок домашнего полотна льняного и тымсамым поднести его ціну.

Курс ткацкий буде тревати 6 до 8 неділь. Условия устройства такого курса сут слідуєчи:

1) На курс мусит ся записати што найменше 20 курсантов. Курсантами можуть быти хлопцы и дівчата, бо курс єст мішаний. Курсанты маюти мати укончену школу народну.

2) Курсанты маюти мати до работы приготовлену пряжу льняну, або волняну.

3) Оплата за курс выносит 2 злоты місячно.

4) Участники курса маюти перестерігати рыгор школьный.

5) Выживленє и помешканє покрываюти курсанты с власных фондов.

Зазначат ся, же на курс могут быти приняти кандыдаты, котры не уміюти ище вырабяти полотно, а также фаховы ткачи.

Переведенє такого курса єст потребне и користне, бо от всіх вышколєных на курсі ткачей можна буде уж на курсі закуповати полотно. Организациом закупа полотна займе ся Краковска Палата Рольна, што дає ручательство, же уконченє такого курса даст курсантам добрый заробок.

Зголошеня на курс належит пересылати на адрес администрации газеты „Лемко“ в Крыниці.

Сесия Сейма и Сената

буде открыта в першой половині жолтня.

Согласно с термином усталєным в выберательном календарі дня 20. вересня генеральный комисар выберательный подал официально результат выборов до Сейма и Сената и в килька дней позднійше росоулал послам и сенаторам их грамоты.

Президент подписал уж также номинации 32 сенаторов и тым закончено формально акто выборов.

Сейм и Сенат маюти собратися найпозднійше в 30 дней по оголошеню выборов, а по неже оголошенє того наступило 20 вересня, то Сейм и Сенат зберут ся найпозднійше 20. жолтня.

В кругах политычных варшавских бесідуюти однак, же палаты парламентарны зберут ся скорше, віроятно в першой половині жолтня.

Мадярам грозиг вымертє.

Регент Венгрии, адмирал Горти, апелює до мадар, штобы старали ся мати численійши родины. Он указэл на факт, што переважна часть мадарских родин старат ся не мати больше, як одну дітину. Горти видит в той системі однодітних родин опасность для независимости Венгрии.

Штобы заохотити родины до пошмарєня той нездоровой системы, власти одного провинционального місточка мадарского в часі місцевого торжества роздали значны нагороды 300 матерям, маючим больше количество дітей.



Замовленя воєнны.

Доходят відомости, што польскы фабрыкы достали уж замовленя на товары воєнны.

По тым вістям одна фабрыка львовска мясных консерв достала с Италии замовленє на доставку трох милионов пушок консерв. Таксамо италияны замовили в Лодзи килькасот тысяч коцов войсковых. Копальні угля надіюти ся также замовленє на уголь, котрый дотепер Италия спроваджала с Англии.


Так то одны нарічути на войну, а другы робят на ней великий бизнес.



Апетит Гитлера на Клайпеду.

Францускы газеты подаюти вісти с засіданя Райхстага в Нормыбергі и выступленє на нем Гитлера. Газеты доносят с натиском, што на нормыбергском конгрєсі с официальной трыбуны бесідовало ся о неизбіжности близкой войны и роздавало ся грозьбы сусідам Німєччины.

Газеты подаюти, што Гитлер совсем недвозмьслєнно повідомил світ о своем апетиті захватити Клайпеду.



Торгы на живину, свині, овцы и дроб.

организує Крак. Палата Рольна в жолтні.

Краковска Палата Рольна подає до відомости, же хотячи улегчити газдам купно отвітнотного материяла расплодного всіх гатунков звірят, приступат до организации сталых ярмаков вмісто практикованого до тепер купна безпосередно у розводитєлей.

Перший того рода ярмак буде сорганизованный через Краковску Палату Рольну в днях 2 и 3 жолтня т. р. в Кракові (на выставовой площі на Малых Блонях) на живину червєно-польску, низинну, свині, овцы и дроб.

На ярмаку буде материял мужеский и женский, походячий с годовлі великой власности. Представленный материял буде мог служити на потреби годовлі зародовой и масовой.

В цілі сориєнтованя ся в запотребованю поодынокых гатунков звірят Крак. Палата Рольна просит переслати ей возможно точны зголошеня.

В будучности продажа материяла годовляного буде отбывати ся лєм в означеном часі и буде организована все через Кр. Палату Рольну.

Появила ся добра книжка.

Труды над поднесенєм господарства в карпатских горах основуюти ся на господарстві в Швайцарии. В краю том знаменито загосподарованы высокогорскы луки и пасовиска уж от давна стали ся базом розвита годовлі домашних звірят, а особливо рога той живины.

Штобы дати возможность широким кругам запознати ся точно со станом и условиями розвита годовлі звірят в Швайцарии, выдавала Краковска Палата Школьна невелику книжку под загл. „Gospodarstwo gorskie w Szwajcarji”.

Книжка написана приступно, описує способы господарства в горах швайцарских. В виду того, што условия тереновы наших и швайцарских гор сут до себе зближены, книжка тота, може причинити ся до поднесеня господарств в наших горах.



РАЦИОНАЛЬНЕ ЗАГОСПОДАРОВАНЄ ВЫСОКОГОРСКИХ ЛУК.

Штобы вести рациональну господарку высокогорских луков, треба передовсем пасовиска навозити гнояницом, або правильным кошарованєм живины. Гнояницу одержує ся через роспущенє водом отходов инвентара. Гнояницом поливат ся от часу до часу пасовиско. Таке навоженє поводує появлянє ся на луках цінных паш под взглядом отживчим и дополнят вычерпуючи ся с почвы складники кормовы.

Кошарованє полігат на безпрестанном (што 1 день або 2) пересуваню місца, на котром стоит инвентар. В послідстві того по якомси часі ціле пасовиско буде заняте постепенно кошаром. Через таке кошарованє навозит ся ціле пасовиско, што має вплив на характер паш. В дакотрых частях воєводства краковского повстали уж такы рациональны господарства пасовисковы.



ДОБРА ГНОЙОВНЯ ХОРОНИТ НАВОЗ ОТ СОПСУТА.

Каждый газда знає барз добре о том, же без кормовых складников в почві жадна рослина не выдаст добрых плодов. Годованы землеплоды маюти розличны под тым взглядом забеганкы, одны меньши, другы больши, одны вымагаюти больше азоту, як потасу, другы (нп. бандуры) потребуюти именно присутствия потасу — але жадна рослина не може добре розвивати ся на землі яловой. Тож каждый газда мусит старати ся для власного добра дати землі потребны для рослин складники кормовы.

Корм тот можна давати в розличной формі в виді оборника, або иавозов штучных. Не подлежит однак сомнію, же оборник єст найважнійшим, а передовсем, найдешевшим жерелом, даючим кормовы складники рослинам. Оборник одержуєме яко побочный продукт при годовлі инвентара живого, тож он властиво нич не коштує, а навозы штучны потягаюти за собом выдаток гроша, котрого газда не має.

Прото старанє о оборник стає ся одним с головных обовязков доброго газды, без котрого не може быти річи о добрых уроджаях, хоцбы мало ся барз добру почву и добру погоду. Часто однак люды не звертаюти належитой увагы на оборник, судячи,

же навоз остане все навозом. Ест то суд ошибочный, бо навоз навозови не ровный и количество его може быти при тых самых условиях ріжне, бо то то все зависит в высокой степени от умілости перехованя навозу.

При перехованю навозу, если допустиме до ферменту (спаленя ся) уж в оборі, то понятно, што навозу много не буде. Найважнійше однак ест задержати всю гнояницу, котра у нас барз часто розливат ся по дорогах. Ест то для господарства велика втрата, бо гнояница містит в собі много отживчих складников, а вяжучи ся с постелінем, увеличат значно количество оборника. Тіснота господарчих поміщень и обор не позвалят звичайно на держанє цілый рок оборника под живином и перехованє его на гнойовнях стає ся конечно. Правда — господавы ввозят часто оборник с под статку, але складают его на звичайны купы, бодай где под голым небом, где літом оборник перепалат ся и выполокують его дощи, в послідстві чого остане его половина, або ище меньше.

Гнойовня, штобы отвічала своєму Perezначеню, мусит быти под дахом, штобы предохранити навоз перед дощовом водом. На гнойовню выберат ся місце на нелеликом поднесеню, (горбку) штобы не подмывала его вода, сплываюча в часі дощей по верха и заскорна. В выбраном місци робиме вглубленє, котрого розміры зависят от количества оборника в господарстві. Глубина не мусит быти велика, выстарчит 50—60 см. Одним с найважнійших условий доброй гнойовні ест, штобы дно и боки были непропущальны, бо иначе гнояница всякат в землю и гине безповоротно. Там, где выбране місце легко пропущат воду, треба дно и боки выложить липоватицом.

До доброй гнойовні господавы заграничны привязуют так велику вагу, же звичайно устроют ю в бетонных долах. Кого стати на то то, нехай не жалует выдатку на бетон, если ні, то по крайней мірі треба ю выложить липком глином. В такой гнойовні, охороненой дахом от дощу и снігу, оборник не лем переховует ся добре и без втрат, але увеличат ся его вартость, бо через лежанє одержует ся продукт выроблєный, придатный найліпше для росзин.

Вывозячи, або вышмаряючи оборник на гнойовню, (особенно в літі) треба его добре убивати, штобы до середены не доходило повітрє, бо под впливом повітря оборник роскладат ся скоро.

Добре ест подсыпати от часу до часу оборник сухым торфом (боровином), котрый втігат дуже гнояницы и не допущат до спалєня ся оборника.



ЗАМАЗКА ДО ЗАКЛЕЄНЯ ШПАР В ФУТРЫНАХ И ПОДЛОЗІ.

При домашних порядках и забезпечаню помешкань перед зимном, што треба робити вчас в осени, добрым средством до заклеєня шпар в дереві ест замазка, зроблена с крейды, покосту и столярского клею.

Замазку робит ся так:

На четверть килограма крейды дає ся 10—15 дкг. покосту, причом покост додаєме покус, вырабляючи крейду на одностайне тісто. До той, наполовину выробленої замазки, додаєме 5 дкг. столярского клею, роспущеного в пару ложках кыпячей воды — на густу теч, котру розрабаме с замазком так долго, аж одержиме одностайну, густу масу, котру можеме свободно гнєсти в руках. Замазка така ест сильна, не кыршит ся и не отпадат.

До заклеєня шпар в подлозі, особенно тых, котрыма достают ся мыши, треба передом до шпары насыпати толченого шкла и аж пак заклеити замазком.



Як забезпечити дом перед вильготом.

Вильготь нищит будынок и здоровье его жителей.

Перед осенними слотами, треба оглянути дах, ци часом не перетекат. Ушкоджєный дах належит направити якнайскорше и не ждати аж до поздной осени.

Рынвы, котры отпrowаджают дощову воду направити, або дати новы. Рынвы (можут быти деревяны жолобки) мают велике значє, бо вода, сплываючи с даху безпосередно, бє с вітром о стіны будынку и творит млакы вокруг дому, котры, всякаючи в землю, подходят под фундамент дому.

Дом вокруг выложить каменєм (выбруковати) або окружити цементовым обрамованєм.

При оцементованю дому, откопуюме вокруг фундаментов землю на глубину лопаты — широко на 50 до 60 см., вбиваючи в берег запущєны в землю дощкы.

На місце выбраной землі сипеме шутер, або угльовы жужлі, равнаючи и убиваючи поверхню. Поверхню шутру заливаме цементом, розроблєным с водом и чистым, зернистым піском. Дощкы служат по то то, штобы край цементового обрамованя был ровный. Цемент, поляный на ровну, гладку поверхню, стинат ся скоро, творячи вокруг сильне, непропущающее воды, обрамованє.

В нарожниках дому робит ся малы заглубленя с жолобком, по котрых стекат вода с рынов.

По выхненю цементу дощкы вынимаєме, а береги равнаєме сильно убитом глином.



СПЕЧЕНА КАРТОФЛЯ ПРИЧИНОМ СМЕРТИ ХЛОПЦА.

В селі Мицкевичи (коло Вильна) притрафил ся незвычайный случай смерти от опарєня.

Одна баба, пасучи коровы, пекла картофлі. Дві свіжо спечєны картофлі дала до ручки своєму 5-літному сынкови, приказуючи ему ити до дому. По дорозі вітер роздул искры, находячи ся в припаленой лупі и от того запалил ся на дитині светер. Дитина попарилась так сильно, же умерла в шпиталю.



О НОВОЙ ГАЗЕТІ. Письмо с Амерыкы.

Минуло уж около три місяцы, отколи редакция старокраєвого „Лемка“ высылат мені газету аж ту далеко, за широке море. Из той газеты довідуюме ся, што наш русский народ на Лемковщині, хоц поволи, але все иде вперед. Организует читальняне житє, аматорскы кружки, кооператывы и т. д. с чого видно, же народ доцінює народну культуральну и економичоу роботу.

Мы гев на американской Руси тыж взяли ся за народне діло, котре оживило ся сильно по основаню через нас новой газеты

„Карпато-руске Слово“.

Кромі того организуете одділы Карпато-русского Союза и хочєме помагати старому краю по можности наших средств.

Штобы мы могли станути на єдиный народный фронт, нам треба тримати ся наших газет. Вы в старом краю, тримайте ся Лемка, а мы гев Карпато-русского Слова и подавайме наши мысли в тых двох газетах.

Наша редакция просит рускы Читальні по обох странах Карпат прислати нам адресы всіх читалєнь так с Галичины, як и с Подкарпатской Руси, а мы пошлєме им нашу гасету. Таким способом затіснит ся звязь медже старым краєм и американском Русью.

Просимє также присылати нам всякы новынкы с русских лемковских и закарпатских сел.

Остаю с братским привітом

Стефан Шкимба

Адрес нашей газеты ест такый:

„Karpato-Russkoye Slovo“

267. E. 10. Str.

New-York N. Y. U. S. of A.



УКРАИНСКИЙ УНИВЕРСИТЕТ В СТА- НИСЛАВОВІ.

В Станиславові має основати ся в коротком часі украинский университет.

Университет тот буде мати на разі лем три факультеты: теологичный, правничий и фильзофичный.

Буде он містити ся в будущом ся уж великом будынку при улиці Грунвальдской.



ЦІНА ЖЕЛ-ДОРОЖН. БИЛЕТОВ МАЄ БЫТИ ОБНИЖЕНА НА ШТРЕКАХ КОРОТШИХ ОТ 80 КМ.

Министерство комуникации приготавливает нову обнижену тарыфу желіздорозну. Тарыфа тота предлужє обниженє цїны о 25 % при переїздах на пространстві до 80 км.

При переїздах на таком пространстві (до 80 км.) можна буде куповати билеты поворотны. Поза том знижком має быти переведєна ревизия льгот и знижок.

Зреформована має быти также система выдаваня билетов окресовых. Віроятно останут лем билеты тыждєны и місячны.



БУНТ БІДАКОВ.

В Лодзи перестало робити 1000 халупников, удержуючих ся с выроба трыкотов. Халупниками называт ся ремесельников, котры для фабрыканта або для skleпу выконуют роботу в дому. Таких халупников выкористуют в страшный способ фирмы, котры дают им роботу. Пересічний заробок халупника-трыкотажа при доброй конюктурі выносит 8 злотых.

Властители трыкотовых варстатов начали в послідных часах обнижати халупникам и тоту маленьку заплату, оправдаючи ся злом конюктуром и тым, же тепер ніт збыта на выробы трыкотарскы. Халупники перестали робити. Голода не боят ся, бо уж до него привыкли. Направду тоты бідакы не можут уж нич втратити. Удержати родину, заплатити за поміщенє, купити даякый лах за 32 місячно, — то уж наравду кпины.

Нужда халупников-трыкотажей ест меньше от нужды халупников-кравцов, або шевцов, котры за кильканадцет годинный день работы, не могут мати достаточного количества теплой стравы. Тож голод, сухоты и другы хвороты десяткуют тых бідаков.

Помєньшили ся замовленя на трыкотовы выробы, треба обкroити бідакам заробкы. Як бідак умре, найде ся другой на его місце.

Што чути в світі.

С Атен (Греція) доносять, же плебісцит в ділі привернення монархии єст отложеный на день 3. листопада т. р.

С Києва (С. С. С. Р.) доносять, же дня 17. вересня закончили ся великы дорочны маневры красной арміи на Совітской Україні.

Во Франції отбуде ся в листопаді т. р. процес против виновникам убийства марсильского на особах короля Алексадра I. и министра заграничных справ французских Барту. Собраный материял слідчий єст так великий, же акты єго наповняють дві комнаты.

В Лондоні (Англія) демонстровано на выставі новий радио-отбаратель, котрый сконструовано нарочно для темных. Апарат для темных єст так сконструованый, же має выбулисту скалю, на котрой при помочи дотыку руками можна отличити назвы стации.

В Прагі (Чехословак) в одном театрі повстал пожар в часі представлення. Гем тому, же артисты вмовили в публику, же огонь єст штучный и належит до представлення, належит завдячити, же не дошло до паники,

Б Кытаю ріка Гоанг-Го перервала тамы и заляла величезне пространство. Безпосередно пошкодованых от наводнення єст перешло пол милиона людей.

На полотно-западной границі англицкых Индий идуť кырвавы бои медже англицкы-ма войсками и повстанцами. В боях тых примінено танкы и самолеты. Силы англицкы выносят 30 тысячей войска. Бои мають характер регулярной войны.

В Афганистані появил ся оригинальный закон. По тому праву афганистанец може ся оженити аж втотчас, як заплатит всі податкы.

Москва Недалеко Свердловска (давні. Екатеринбург) на Уралю надыбано великы поклады золота. В коротком часі найдено 31. самородов золота, серед котрых 4 важат по 1/2 кг.

Во Фрыдку на Моравах спалила ся стодола, в котрой спало много бідаков. Спало ся 17-ро люда.

Через досліды усталено, же людскый голос расходит ся неимовірно скоро, именно телефоном без дрота перелітат он вокруг земску кулю в 1/4 части секунды.

До вязницы в Есфорд в державі Миссисипи (Амер. Полн.) вдерла ся толпа людей и по стероризованю трох полициянтов, забрала оттамаль мурина, подозрілого о убийство білого. Мурина повісили за містом.

Женева. Теперешна сесия Рады Лиги Народов єст уж послідна в старом будынку.

Слідуюче засіданє отбуде ся в новом дворці Лиги Народов. Дворец єст барз великий и містит в собі 440 меньших и 12 великих саль, перезначеных на засіданє поодыноких комисий. В головной салі находит ся 2200 місц. Новый будынок буде мати власну почту, надавательну радио-стацию, кино, реставрацию, салю гимнастичну, бар и т. д. На будову того дому зложили ся многы державы.

Село без видов. На Венграх єст село Деренк, котре числит 439 душ. Всі жителі того села наміряють тепер оставити домы и выпровадити ся дагде инде и там поселити ся, бо Деренк лежить серед густых лісов державных и не має нияких видов на розвистє.

С Лондона доносять, же єсли Италия заатакує Англию в Египті, або в Палестыні, то Турция поможе Англіи и отдаст до розпорядимости Лиги Народов першорядну армію.

Відень. До почтового уряда в Линцу надышло с Сальцбурга 30 пачок, адресованых до высокых урядников. Понеже пачкы виглядали подозрітельно, начальник почты приказал отворити пачкы. При отбиваню першой, пачка експлодовала и ранила урядника. В справі той ведут слідство, бо не знають, кто надал пачкы, ци народны социялисты, ци комунисты.

Сполучены Державы Амер. Полн. приступили до будовы канала фльорыдского, котрый получит океан Атлянтцкый с Мексыканским заливом.

Король англицкый Юрий звернул ся отручным писмом до короля италянского Емануеля, в котром просит єго ужити всі свои впливы в цілі ратованя мира.

Совіты привернули декретом давны буржуазный рангы войсковы войскам сухопутным и морским и установили рангу Маршала С. С. С. Р., котру буде надавати Центр. Исп. Комитет высшим офицерам за незвычайны заслугы.

Вісти с краю.

В Подмихайлю (воєвод. станославовске) устроєно День Руской Культуры старанєм рускых организаций при участі килькасот людей. В часі академии промовяли прелегенты со Львова, котры завзывали собраних до натуженой діяльности в напрямі вскріплення руского житя на всходных окраинах Річипосполитой.

Банк Польскый пригадує, же буде выміняти лем до 30. вересня будучого року великы серебряны 5-злотовы гроши. Паперовы 10-злотовы банкноты с датом емисии 20. липня 1924. буде банк принимати до грудня 1637 р. Термим выміны 20-злот. банкнотов с емисий с року 1926, 1929 и 1931 минат с 1. липня 1939 року.

Во Львові злодіи вдерли ся до канцелярии Библиотеки Народной „Оссолинеум“, розбили огоньотрєвалу касу и украли 1000 злотых.

В ЗИМІ ОТБУДЕ СЯ В КРЫНИЦІ СЕЛІ КУРС ТКАЦКЫЙ

Оплата за науку на курсі выносит 2 зл. Участники курсу не достають поміщення и удержаня. Курсанты мусят приготовити льняну, або волняну пряджу. Мусят они собовязати ся перестерігати рыгор школьный.

Зголошеня принимат администрация газеты Лемко в Крыниці.

Важне для читалень и аматороных кружков!

В КРЫНИЦІ-СЕЛІ ОТБУДЕ СЯ ДВО-МІСЯЧНЫЙ КУРС ДЫРЫГЕНТОВ ХОРОВ.

Курс начне ся 1. листопада т. р. и обийме теорию и практику потребну до веденя аматорских хоров. Буде учити ся также церковного співу.

Оплата за науку на курсі выносит 20 злотых.

Курсанты с инших сел достанут поміщення, без удержаня.

Удержанє мусит покрити сам курсант.

Кромі того устроює ся в том самом часі также

ВЫСШИЙ КУРС

для тых, котры уж в прошлом року окончили курс низший.

Оплата за курс высший выносит 25 злотых.

Зголошеня принимат

г-н Александер Ропицкый в Крыниці Здрою

(дом г-на Александра Поглида)